



Der Stuttgarter Hauptbahnhof um 1870. Links neben der Bahnhofshalle der Prinzenbau, das Hotel Marquardt (mit Wäsche auf dem Dach) und die Türme der Stiftskirche

Uffm Bah'hof

I stand gern uffm Bah'hof 'rom
Ond guck mr d'Leut' so a' –
Mr glaubt jo et, was mr do älls
Seah ond verleaba ka'!

Do sitzt a Pärle uff dr Bank,
Wia wenn's em Wald dren wär';
A alter dicker Herr stelzt mit
Seim Dackele drher!

A schickes Fräulein täppelt 'rom,
Kassiert d'Blick' von de Leut';
A Ma' mit ama kloina Rausch
Hot mit 'm Schaffner Streit!

A andrer stoht mit seiner Frau
Em schwarza Häs, ganz bleich;
'r trägt 'n dicka Kranz am Arm –
Dia fahret zu 'ra Leich'!

No kommet d'Buaba von dr Schual
Ond machet elend Krach,
Ond d'Mädla gurrat zwischane'
Wia d'Taubä uffm Dach!

A ganze Gsellschaft gibt oim 's Gloit:
Lacht ond heult schier en oim –
Dr Onkel aus Amerika,
Der roist jetzt wieder hoim! –

Do denkt wohl oiner au von mir:
Ha, der hot scheints viel Zeit –
Was stoht der Kerle bloß do rom
Ond glotzt so noch de Leut'?!
Wendelin Überzwerch